



**PERUTUSAN DATUK BANDAR  
MESYUARAT MAJLIS BIL. 7 /2020  
26 OGOS 2020 (7 MUHARRAM 1442H)**

**BISMILLAHIRRAHMANIRRAHIM**

Assalamualaikum WBT dan Salam Sejahtera.

1. Alhamdulillah, puji dan syukur kepada Ilahi di atas pelbagai kurniaan dan anugerah yang tidak terhitung buat kita semua. Selawat dan salam ke atas junjungan besar Nabi Muhammad SAW, keluarga, sahabat dan mereka yang mengikut jejak langkah Baginda hingga ke hari kesudahan.

Terima kasih kepada semua Ahli Majlis, Ketua Jabatan, pegawai-pegawai dan warga kerja Majlis Bandaraya Petaling Jaya yang sentiasa memberikan kerjasama dan komitmen kepada Majlis bagi memastikan penyampaian perkhidmatan berjalan lancar dan dapat dilaksanakan dengan sebaiknya.

**2. MEMPERKASA PROFESIONALISME DAN INTEGRITI**

Dalam menjalankan tugas dan tanggungjawab, elemen integriti perlu diamalkan oleh setiap penjawat awam. Penerapan nilai-nilai integriti amat penting bagi memastikan perkhidmatan yang disampaikan dan pengurusan pentadbiran sentiasa menjalankan tugas dengan profesional, amanah, bertanggungjawab, berintegriti selain membina

mutu kerja cemerlang yang luhur sekali gus membentuk suasana berpasukan yang membudayakan mutu kerja yang berprestasi tinggi.

Kepentingan meletakkan budaya berintegriti di tahap tertinggi bukanlah sesuatu yang baharu sebaliknya ianya perlu menjadi keutamaan dalam kegiatan seharian kita. Amalan budaya kreatif dan kritis perlu digalakkan agar setiap penjawat awam boleh mempertajamkan dan mengaplikasikan kebolehan mereka mengikut bidang kepakaran masing-masing, sekali gus memperkukuh amalan budaya berintegriti.

Selain individu, organisasi juga mesti mempunyai integriti. Integriti organisasi tercermin dalam pelaksanaan kod etika, piagam pelanggan atau sistem dan proses kerja serta pematuhan kepada amalan terbaik. Kod etika organisasi ditegaskan, diulangi dan dihayati oleh anggota organisasi berkenaan sehingga menjadi kebiasaan dan akhirnya menjadi budaya organisasi.

Selain daripada itu, penubuhan Unit Integriti di semua agensi awam adalah bertujuan untuk menyepadukan semua pengurusan yang berkaitan dengan integriti di bawah sebuah unit yang khusus supaya inisiatif-inisiatif pencegahan, pematuhan, pengesanan salah laku dan tindakan punitif dapat dilaksanakan secara lebih fokus, efisien dan mencapai keberhasilan yang optimum.

Majlis Bandaraya Petaling Jaya melalui Unit Integriti telah melaksanakan pelbagai bentuk program kesedaran termasuk bekerjasama dengan agensi-agensi luar terutamanya dengan SPRM dalam usaha membendung salah laku jenayah serta pelanggaran tatakelola dan etika organisasi. **'Program 1 Jam Bersama Suruhanjaya Pencegahan Rasuah Malaysia (SPRM) Di Jabatan-Jabatan MBPJ'** telah dilaksanakan bermula Mac hingga Disember 2020 dan **'Bengkel Corruption Risk Management (CRM)'** yang

dijangkakan dilaksanakan sekitar Oktober 2020 ini adalah salah satu usaha Majlis dalam membantu mengenal pasti kelemahan struktur yang mungkin membuka peluang kepada berlakunya rasuah, menyediakan rangka kerja untuk mengenal pasti faktor risiko serta menerap elemen pencegahan rasuah dalam rangka tadbir urus yang mantap.

Secara keseluruhannya, anggota perkhidmatan awam perlu berpegang kepada prinsip, disiplin moral yang tinggi dan nilai-nilai integriti di dalam perkhidmatan awam. Perkara ini merupakan antara aspek yang penting serta menjadi kayu pengukur dalam menentukan kestabilan sistem perkhidmatan awam serta ukuran dalam menentukan kemantapan pengurusan pentadbiran sesebuah negara.

### **3. PENGURUSAN TENAGA BANGUNAN MAJLIS BANDARAYA PETALING JAYA**

Majlis melalui Jabatan Kawalan Bangunan, selalu urusetia kepada Program Tenaga Lestari ke arah bandar karbon rendah Petaling Jaya telah meneruskan agenda program tersebut dengan mengadakan Bengkel Asas dan Fasilitasi Pengurusan Tenaga Bagi Bangunan-Bangunan Majlis selama 2 hari bertempat di Bandar Utama baru-baru ini.

Tujuan diadakan bengkel ini adalah bagi menubuhkan sebuah Jawatankuasa Teknikal yang akan diwakili oleh Jabatan-Jabatan teknikal yang berkaitan serta penetapan polisi pengurusan tenaga MBPJ dalam menerapkan kesedaran penggunaan tenaga dengan lebih cekap dan menjimatkan kos. Dalam melaksanakan pengurusan cekap tenaga yang lebih efisien dan efektif pada bangunan, Majlis bersama-sama SEDA Malaysia akan membantu dalam memberi nasihat dan panduan dalam pelaksanaan polisi pengurusan tenaga Majlis selain garis panduan berasaskan Piawaian Malaysia (MS) 1525.

Majlis akan memberi sokongan melalui pembangunan kapasiti kakitangan Majlis bagi merealisasikan aktiviti berkaitan bangunan cekap tenaga bagi bangunan baharu mahupun sedia ada bertujuan untuk memberi penurunan tenaga pada bangunan bermula dengan warga Majlis dan seterusnya kepada pemegang taruh Petaling Jaya, dalam mencapai sasaran agenda karbon rendah Bandaraya Petaling Jaya 2030.

#### **4. KAWALAN KESIHATAN : SITUASI KES DEMAM DENGGI DI PETALING JAYA**

Jumlah kes demam denggi yang dilaporkan pada Minggu Epid (ME) ke 33/2020 adalah sejumlah **3,087 kes** yang dilaporkan. Laporan kes demam denggi ini menunjukkan penurunan sebanyak 41 peratus berbanding tahun 2019 sebanyak 5,221 kes.

**Tiada jumlah lokaliti hotspot yang aktif dilaporkan** sehingga ME 33 (26 Julai 2020 – 1 Ogos 2020) dan ME 34 (2 Ogos 2020 – 8 Ogos 2020) di kawasan pentadbiran MBPJ. Namun, 1 kes kematian dilaporkan pada tahun 2020.

Walau bagaimanapun, jumlah ini merupakan jumlah yang **terendah** berbanding 2 PBT yang lain di daerah Petaling. MBPJ merekodkan sejumlah **3,087 kes**, MBSA 4,354 kes dan MBSJ 5,086 kes.

#### **5. PROGRAM SPRING CLEANING SEMPENA HARI KEBANGSAAN**

Majlis Bandaraya Petaling Jaya sedang menganjurkan program *Spring Cleaning* sempena Hari Kebangsaan pada setiap hari Sabtu dan Ahad bermula 22 Ogos 2020 hingga 13 September 2020. Kempen yang dianjurkan ini mendapat kerjasama daripada *The CAREton Project* iaitu

usaha sama di antara pihak Nestle Malaysia (Milo) dan Tetrapak Malaysia yang menjalankan kempen kitar semula kotak minuman.

Untuk makluman, program *spring cleaning* kali ini turut menerima bahan buangan bekas kotak minuman selain barangan perabot dan elektronik. Sehubungan itu, orang awam diminta untuk meletakkan barangan yang hendak dikitar semula di hadapan rumah sebelum pukul 10.00 pagi (kutipan tidak akan dilakukan sekiranya lewat). Berikut adalah senarai lokasi terpilih sempena program *Spring Cleaning*:

<b>Tarikh</b>	<b>Lokasi</b>	<b>Pegawai Bertanggungjawab</b>
22 Ogos 2020 (Sabtu)	Seksyen 22, Seksyen 14, PJS 3 & PJS 4	En. Shah : 019-5025773 En. Qusairi : 011-10104745
23 Ogos 2020 (Ahad)	Seksyen 6, Seksyen 7, Seksyen 8 & PJS10	En. Muiz : 018-2624345 En. Qusairi : 011-10104745
29 Ogos 2020 (Sabtu)	SS9, SS9A & SS 3	En. Nasarudin : 011-11536433 En. Fitri : 017-6244923
30 Ogos 2020 (Ahad)	Seksyen 11, Seksyen 12, Seksyen 16, Seksyen 18 & Seksyen 1A	En. Shah : 019-5025773 En. Kaslan : 012-3539666
5 September 2020 (Sabtu)	Seksyen 9, Seksyen 10, Seksyen 11 (Kota Damansara)	En. Azmil :017-6545450
6 September 2020 (Ahad)	Seksyen 20, Seksyen 21 & SS20	En. Shah : 019-5025773 En. Fadzil : 017-3946906
12 September 2020 (Sabtu)	Aman Suria & Kg. Cempaka	En. Izwan :017-3358158
13 September 2020 (Ahad)	SS4 & Seksyen 1	En. Nasarudin : 011-11536433 En. Kaslan : 012-3539666

## **6. MALAYSIA PRIHATIN : KEMPEN KIBAR JALUR GEMILANG SEMPENA BULAN KEBANGSAAN 2020**

Tanggal 31 Ogos pada setiap tahun merupakan tarikh keramat bagi seluruh rakyat di negara ini. Pada tarikh tersebut merupakan hari yang sangat bermakna buat seluruh rakyat Malaysia kerana pada tarikh itu seluruh rakyat Malaysia menyambut Hari Kebangsaan.

Hari Kebangsaan ini disambut secara besar-besaran sama ada di peringkat kebangsaan ataupun negeri. Perasaan betapa tingginya nilai dan erti kemerdekaan dalam kalangan mereka yang pernah berjuang untuk mencapai kemerdekaan tidak mampu diterjemahkan melalui penulisan ataupun kata-kata.

Hanya mereka yang terlibat secara langsung dalam proses kemerdekaan ini dapat merasai perasaan yang sebenarnya betapa tingginya nilai sebuah kemerdekaan yang dikecapi selama 63 tahun yang lalu.

Oleh yang demikian, adalah menjadi satu kewajipan kepada seluruh rakyat Malaysia pada hari ini untuk mempertahankan negara tercinta daripada dijajah kali kedua sama ada penjajah fizikal, minda ataupun sosial.

Penjajahan fizikal mungkin sukar untuk berlaku, namun penjajahan minda dan sosial tidak mustahil sekiranya tiada sebarang langkah proaktif yang diambil oleh rakyat di negara ini. Generasi muda terutamanya perlu dan sentiasa menjadi benteng paling utuh buat negara dalam memelihara kemerdekaan ini kerana ia bukan sesuatu perkara yang murah dan mudah untuk diperolehi dan dicapai.

Bagi pentadbiran Kerajaan Negeri Selangor, pada 28 Julai 2020 yang lalu telah diadakan majlis **Pelancaran Hari Kebangsaan dan Kempen Kibar Jalur Gemilang Peringkat Negeri Selangor** bertempat di Auditorium Dewan Jubli Perak, Sultan Abdul Aziz Shah Alam. Majlis pelancaran dan kempen ini juga diadakan secara serentak seluruh Negara.

Selari dengan situasi yang melanda negara pada ketika ini, '**Malaysia Prihatin**' diangkat sebagai tema Hari Kebangsaan pada tahun ini dengan membawa maksud yang cukup mendalam kepada rakyat Malaysia seiring keadaan negara yang masih berdepan dengan penularan pandemik COVID-19.

Selari dengan semangat cintakan Negara, orang ramai hendaklah mengibarkan Jalur Gemilang dengan megah kerana ini adalah panji kebanggaan kita semua. Hayati makna dan prinsip Rukun Negara sebagai pengikat perpaduan dan kesejahteraan rakyat Malaysia. Marilah bersama-sama kita kibarkan Jalur Gemilang dan meraikan Hari Kebangsaan.

Pengibaran Jalur Gemilang ini juga adalah untuk menyemarakkan lagi semangat patriotisme dan rasa cinta tanpa berbelah bahagi kepada negara. Selaku Datuk Bandar, saya ingin mengingatkan agar kesemua pengibaran bendera Jalur Gemilang ini berada dalam keadaan baik, tidak lusuh serta yang paling utama adalah dipasang dalam kedudukan yang betul.

Program Majlis Sambutan Hari Kebangsaan Ke-63 dan Kempen Kibar Jalur Gemilang Peringkat MBPJ akan diadakan pada jam 12.00 tengah hari ini bertempat di Dewan Banquet, Dewan Sivik MBPJ. Semua Ahli Majlis, Ketua Jabatan dan Pegawai dijemput hadir.

**Sekian, terima kasih.**